



UP SANDIWA SAMAHANG BULAKENYO

SALIGANG BATAS

UP SANDIWA SAMAHANG BULAKENYO

SALIGANG BATAS

PREAMBULO

Kami, ang mga mag-aaral ng Unibersidad ng Pilipinas mula sa Bulacan, na nagbubuklod upang mapataas ang kamalayan ukol sa usaping panlipunan tungo sa makabuluhang pagkilos at paglilingkod, ay taos-pusong nagpapatibay at nagpapahayag ng Saligang Batas na ito.

ARTIKULO I

PANGALAN AT KAKANYAHAN

Seksyon 1. Pangalan

Ang samahang ito ay makikilala sa pangalang UP SANDIWA SAMAHANG BULAKENYO. Maaari ring tawagin ang organisasyon sa pinaikling pangalan na 'Sandiwa'.

Seksyon 2. Simbolo

Ang samahang ito ay may opisyal na sagisag na kumakatawan sa mga layunin at adhikain ng samahan.

2.1. Tatsulok na Tatlong Magkakapatong na Kawayan

Ito ay sumisimbulo sa tatlong republika na naitatag sa Bulacan: Republika ng Biak-na-Bato, Republika ng Kakarong de Sili, at Republika ng Malolos.

2.2. Dahon ng Laurel

Ito ay sumisimbolo sa husay ni Francisco 'Balagtas' Baltazar bilang makata at isa sa kinikilalang personalidad sa Bulacan. Ito rin ay sumisimbolo sa tagumpay.

2.3. 'UPS' at 'SANDIWA'

Ito ay sumasagisag sa pangalan ng organisasyon, UP SANDIWA SAMAHANG BULAKENYO.

2.4. Araw

Ito ay sumasagisag sa pagkakabilang ng Bulacan sa walong lalawigan na unang nag-aklas laban sa pananakop ng mga Kastila.

2.5. Lampara, pluma, at papel

Ito ay sumisimbolo sa kagalingang pang-akademiko.

2.6. Puno ng Alibangbang

Ito ay sumisimbolo sa pagiging makakalikasan.

2.7. Tao

Ito ay sumisimbolo sa lakas-paggawa at pagkakaisa.

2.8. 1994

Ito ay sumisimbolo sa taon ng pagkakatatag ng UP SANDIWA SAMAHANG BULAKENYO, Setyembre 1, 1994.

Seksyon 3. Kulay

Ang samahang ito ay may kulay na luntian, dilaw, pula, at itim. Ang mga sagisag ng kulay ng samahan ay:

3.1. Luntian

Sumasagisag sa kalikasan at pag-asa;

3.2. Dilaw

Sumasagisag sa karunungan;

3.3. Pula

Sumasagisag sa damdaming makabayan; at

3.4. Itim

Gagamitin ang kulay na ito sa sagisag kung hindi lalagyan ng mga naunang kulay.

ARTIKULO II

PUNONG HIMPILAN

Ang punong himpilan ng samahan ay matatagpuan sa School of Environmental Science and Management (SESAM) Gardens, Unibersidad ng Pilipinas sa Los Baños, Laguna.

ARTIKULO III

PAGLALAHAD NG PANININDIGAN

- Seksyon 1.** Ang UP SANDIWA SAMAHANG BULAKENYO ay naninindigang itaguyod ang mithiing pagbuklurin ang mga Bulakenyong mag-aaral ng Unibersidad ng Pilipinas, Los Baños sa pagpapataas ng kamalayan sa usaping panlipunan tungo sa makabuluhang pagkilos at paglilingkod sa sambayanan.
- Seksyon 2.** Ang UP SANDIWA SAMAHANG BULAKENYO ay naniniwala sa mahalagang gampanin ng mga mag-aaral sa pagpapaunlad at pagpapalaganap ng kamulang panlipunan.
- Seksyon 3.** Ang UP SANDIWA SAMAHANG BULAKENYO ay naniniwala sa mahalagang gampanin ng mga mag-aaral tungo sa pagsulong ng kaalamang pang-akademiko.
- Seksyon 4.** Ang UP SANDIWA SAMAHANG BULAKENYO ay naninindigang itaguyod ang kapatiran, kapakanan, at karapatan ng mga kasapi nito.

ARTIKULO IV

PAGLALAHAD NG MGA TUNGKULIN

- Seksyon 1.** Palaganapin at paunlarin ang makabayan, malaya, at bukas na pag-iisip at pagkilos sa hanay ng mga mag-aaral.
- Seksyon 2.** Patuloy na palalimin ang pagsusuri sa lipunan upang tumugon sa pangangailangan ng mga mag-aaral ng Unibersidad ng Pilipinas.
- Seksyon 3.** Patuloy na palalimin ang pagsusuri sa lipunan upang tumugon sa pangangailangan ng sambayanang Pilipino.

ARTIKULO V

MGA GAMPANIN

- Seksyon 1.** Palagiang maglunsad ng mga proyektong tutugon sa pagpapalaganap at pagpapaunlad ng makabayan, malaya, at bukas na kaisipan at pagkilos.
- Seksyon 2.** Magbalangkas ng taunang programang tutugon sa paninindigan at layunin ng UP SANDIWA SAMAHANG BULAKENYO.
- Seksyon 3.** Mangasiwa sa mga tukoy na proyektong pampaaralan at pampamayanan.

ARTIKULO VI

ANG KASAPIAN

Seksyon 1. Ang kasapiang ng UP SANDIWA SAMAHANG BULAKENYO ay binubuo ng mga mag-aaral ng Unibersidad ng Pilipinas sa Los Baños na nagmula o kasalukuyang naninirahan sa Bulacan at naniniwala sa paninindigan at layunin ng organisasyon.

Seksyon 2. Kwalipikasyon upang maging kasapi:

2.1. Ang mga indibidwal na nagnanais sumali ay dapat na:

2.1.1. mga mag-aaral ng Unibersidad ng Pilipinas sa Los Baños na nagmula o naninirahan sa Bulacan

2.1.2. may dalawang semestre pang natitira sa unibersidad.

2.2. Sinuman na nais sumali na hindi kabilang alinman sa mga nabanggit ay pagpapasyahan ng hindi bababa sa korum o dalawang-katlo (2/3) ng kapulungan.

Seksyon 3. Ang tinutukoy na kasapiang ay ang mga sumusunod:

3.1 Ganap at opisyal na tinatanggap ng samahan bilang kasapi matapos sumailalim sa proseso at final rites na itinakda ng organisasyon. Sila ay tatawagin na residenteng miyembro ng organisasyon.

3.2 Probisyonaryong kasapi na hindi pa nabibigyan ng pagkilala.

Seksyon 4. Ang mga kasapi ng organisasyon ay nahahati sa iba't ibang klasipikasyon:

4.1. Founders - mga kasapi na unang pumasok at nagtaguyod sa organisasyon.

4.2. Resident Members - mga kasapi na kasalukuyang nag-aaral sa UPLB.

4.2.1. Active - mga residenteng nagsumite at nagsagot ng activity form.

4.2.2. Inactive - mga residenteng nagpasa ng *inactivity letter* at naaprubahan ng lupong tagapagpaganap.

4.3. Non-resident members - mga naging kasapi ng organisasyon ngunit hindi nakapagpatuloy dahil lumipat o tumigil na sa pag-aaral.

4.4. Alumni Members - mga kasapi na nakapagtapos na ng pag-aaral sa UPLB.

4.5. Honorary Members - mga indibidwal na nakapagbigay ng makabuluhang kontribusyon sa organisasyon.

ARTIKULO VII

PAKIKIPAG-UGNAYAN

Seksyon 1. Ang UP SANDIWA SAMAHANG BULAKENYO ay bukas makipag-ugnayan sa iba pang samahan o sektor ng lipunan

Seksyon 2. Ang mga samahan o sektor na tinutukoy ay dapat na gumagalang sa paninindigan at layunin ng UP SANDIWA SAMAHANG BULAKENYO.

ARTIKULO VIII

BALANGKAS NG ORGANISASYON

Seksyon 1. Ang saligang balangkas na kumakatawan sa samahan ay bubuuin ng sumusunod:

1.1. Lupong Tagapagpaganap;

1.2. Mga Lupon; at

1.3. Pangkalahatang Kasapian.

Seksyon 2. Ang Lupong Tagapagpaganap.

Ang lupong tagapagpaganap ay bubuuin ng tagapangulo, ikalawang tagapangulo, kalihim, at ng mga pinuno ng mga lupon.

Seksyon 3. Ang mga Lupon:

Ang iba't-ibang mga lupon ay:

1.1. Lupon sa Edukasyon at Pananaliksik;

1.2. Lupon sa Kasapian;

1.3. Lupon sa Pamamahayag at Publikasyon;

1.4. Lupon sa Pananalapi; at

1.5. Lupon sa Ugnayang Panlabas.

1.6. Lupon sa Kalihiman

Seksyon 4. Ang Pangkalahatang Kasapian

Ito ay bubuuin ng pangkalahatang kasapian ng Sandiwa.

ARTIKULO IX

MGA TUNGKULIN NG PAMUNUAN

Seksyon 1. Ang Lupong Tagapagpaganap:

Ang Lupong Tagapagpaganap ay may tungkuling:

1.1 Talakayin ang mga plano at proyektong pangsamahan na ihaharap sa pulong ng pangkalahatang kasapian; at

1.2 Magpatupad ng mga mahahalagang desisyon sa usaping kinakailangan ng kagyat na katugunan.

Seksyon 2. Tagapangulo

Ang Tagapangulo ay may tungkuling:

2.1. Mamahala at manguna sa pagpupulong ng lupong tagapagpaganap at pangkalahatang kapulungan;

2.2. Mangasiwa sa mga desisyon sa mga usaping panlabas;

2.3. Kumatawan at maging tagapagsalita sa mga usaping panlabas; at

2.4. Magpatupad ng mga desisyon sa mga usaping kinakailangan ng kaagad na katugunan.

Seksyon 3. Ikalawang Tagapangulo

Ang ikalawang tagapangulo ay may tungkuling:

3.1. Gampanan ang mga gampanin ng tagapangulo sa panahong hindi ito kayang gampanan ng tagapangulo.

3.2. Mamahala sa pagtanggap, pag-aalaga, pagbubuklod-buklod at maging pagtitiwalag kung kinakailangan ng mga kasapi;

3.3 Magsaad ng pamantayan para sa mga di aktibong

miyembro;

3.4. Magtalaga ng kinakailangang bilang o porsiyento ng pagdalo ng mga miyembro sa mga pagpupulong at mga aktibidad; at

3.5 Pamahalaan ang Lupon sa Kasapian

Seksyon 4. Pangunahing Kalihim

Ang Pangunahing Kalihim ay may tungkuling:

4.1. Mag-ingat at mamahala ng mga mahahalagang dokumentong pang-samahan;

4.2. Mag-organisa ng listahan ng mga miyembro na dumadalo sa mga pagpupulong at kaganapan ng organisasyon;

4.3. Magtala at mag-ulat ng katitikan ng mga pagpupulong;

4.4. Ayusin at panatilihin kumpleto ang listahan ng mga miyembro ng organisasyon;

4.5. Iproseso ang opisyal na pagkilala sa organisasyon bawat semestre.

4.6. Pamahalaan ang Lupon sa Kalihiman.

Seksyon 5. Mga Pinuno ng Lupon

Ang Pinuno ng mga Lupon ay may tungkuling:

5.1 Dumalo sa mga pagpupulong ng lupon tagapagpaganap;

5.2 Mag-ulat sa lupon tagapagpaganap hinggil sa mga proyektong ilulunsad ng kanilang mga lupon;

5.3 Magbigay ng kasanayan sa mga kasaping nabibilang sa kanilang lupon; at

5.4 Makipag-ugnayan sa ibang mga pinuno ng mga lupon.

Seksyon 6. Pagbitiw sa Tungkulin

Ang pamunuan ay maaaring umalis sa kanyang panunungkulan kung kinakailangan. Ang proseso ng pagbibitiw sa tungkulin ay sa pamamagitan ng:

6.1 Paghahain ng pormal na sulat sa kasapian na nagsasaad ng pagnanais na bumitiw sa tungkulin, gayundin ng mga kadahilanan ng desisyon na ito.

6.1.1. Ipresenta sa kasapian ng organisasyon ang pormal na sulat na nagsasaad ng pagnanais na bumitiw sa tungkulin.

6.1.2. Ang hindi paghahain ng kasulatan sa kasapian at hindi pagganap sa kanyang tungkulin ay sapat na rason upang siya ay idaan sa proseso ng pagtitiwalag.

6.2 Anuman sa mga naunang seksyon na nabanggit ay dapat sang-ayunan ng kasalukuyang kasapian, o ng dalawang-katlo (2/3) o korum nito.

6.3 Ang mababakanteng posisyon ay maaaring:

6.3.1. punan sa pamamagitan ng nominasyon at espesyal na eleksyon;

6.3.2. punan ng kasapi na inirekomenda ng Lupong Tagapagpaganap kung sasang-ayunan ng buong kasapian, o ng dalawang-katlo (2/3) o korum nito; o

6.3.3. maiwang bakante kung ito ang desisyon ng buong kasapian, o ng dalawang-katlo (2/3) o korum nito.

ARTIKULO X

ANG MGA LUPON

Seksyon 1. Lupon sa Edukasyon at Pananaliksik

Ang Lupon sa Edukasyon at Pananaliksik ay may tungkuling:

1.1 Maglunsad at mamahala sa pag-aaral at talakaying ilulunsad ng samahan; at

1.2 Bantayan ang kalagayang pang-akademiko ng mga kasapi ng organisasyon.

1.3 Maglabas ng opisyal na pahayag sa mga napapanahong isyu sa lipunan kung kailan kinakailangan;

1.3.1 Ang bawat opisyal na pahayag na ilalabas ng organisasyon ay kinakailangan ng mayoryang boto mula sa kasalukuyang parte ng kasapian.

Seksyon 2. Lupon sa Kasapian

Ang Lupon sa Kasapian ay may tungkuling:

2.1 Mamahala sa pagtanggap, pag-aalaga, pagbubuklod-buklod at maging pagtitiwalag kung kinakailangan ng mga kasapi;

2.2 Magsaad ng pamantayan para sa mga di aktibong miyembro; at

2.3 Magtalaga ng kinakailangang bilang o porsiyento ng pagdalo ng mga miyembro sa mga pagpupulong at mga aktibidad.

Seksyon 3. Lupon sa Pananalapi

Ang Lupon sa Pananalapi ay may tungkuling:

3.1 Maglikom at gumugol ng pondo para kung kinakailangan

ng pondo ng samahan;

3.2 Mag-ingat at mamahala ng pondong gagamitin sa mga proyekto ng organisasyon;

3.3 Magtala ng kalagayang pinansyal ng samahan; at

3.4 Mag-ulat tungkol sa kalagayang pinansyal ng samahan tuwing kinakailangan at ilabas ang kabuuang ulat pampinansyal tuwing matatapos ang semestre.

Seksyon 4. Lupon sa Pamamahayag at Publikasyon

Ang Lupon sa Pamamahayag at Publikasyon ay may tungkuling:

4.1 Mamahala sa pagpapahayag ng mga proyektong inilulunsad ng samahan, at mga balita tungkol sa mga miyembro nito sa pamamagitan ng iba't ibang uri ng midya;

4.2 Maglathala ng Kamalayan, opisyal na publikasyon ng UP SANDIWA SAMAHANG BULAKENYO, bawat taon; at

4.3 Ipunin ang lahat ng mga materyales na nailabas sa bawat taon ng pamunuan upang maipasa sa susunod na mga miyembro ng lupon tagapagpaganap.

Seksyon 5. Lupon sa Ugnayang Panlabas

Ang Lupon sa Ugnayang Panlabas ay may tungkuling:

5.1 Makipag-ugnayan sa iba't-ibang samahan o sektor sa loob at labas ng pamantasan;

5.2 Mangasiwa at kumatawan sa mga gawaing paglilingkod ng samahan, pampaaralan man o pampamayanan;

5.3 Irepresenta ang organisasyon sa mga pagpupulong na itinakda ng ibang samahan, organisasyon at ng

SOAD-OSA; at

5.4 Mag-ingat ng mga importanteng numero, address at email ng mga iba't-ibang samahan o sektor sa loob at labas ng pamantasan.

Seksyon 6. Lupon sa Kalihiman

6.1. Ang Lupon sa Kalihiman ay:

6.1.1. Bubuohin ng mga mapipiling deputy officers ng bawat lupon;

6.1.2. Pamamahalaan ng Pangunahing Kalihim.

6.2. Ang Lupon sa Kalihiman ay may tungkuling:

6.2.1. Humalili sa pinuno ng lupon kaniyang kinabibilangan, bukod sa lupon na ito;

6.2.2. Punan ang tungkulin ng pangunahing kalihim sa oras na siya ay wala;

6.2.3. Maglista ng mga miyembro ng bawat lupon na napunta sa mga pagpupulong at kaganapan ng organisasyon; at

6.2.4. Magtala at mag-ulat ng katitikan ng mga pagpupulong sa kanilang lupon;

6.3. Pagpili sa mga Deputy Officers.

6.3.1. Ang mga deputy officers ng bawat lupon ay pipiliin sa pamamagitan ng botasyon na magaganap sa loob ng kanilang lupon.

6.3.2. Ang mga residente ay mapapasama sa mga pagpipilian sa nasabing posisyon kung sila ay:

6.3.2.1. Mag-prisinta at magpakita ng kagustuhan sa posisyon;

6.3.2.2. I-nomina ng iba pang miyembro ng lupon;

at

6.3.2.3. I-nomina ng Pinuno ng kanilang lupon;

6.3.3. Magiging ganap lamang na Deputy Officer ang isang residente kung makamit nito ang mayoryang boto ng mga miyembro ng kaniyang lupon.

ARTIKULO XI

ANG MGA TAGAPAYO

Seksyon 1. Ang organisasyon ay magkakaroon ng dalawang tagapayo na nagtuturo sa Unibersidad ng Pilipinas - Los Baños.

Seksyon 2. Ang mga aktibidad at kaganapan ng organisasyon ay maaaring isangguni sa mga tagapayo.

Seksyon 3. Ang proseso ng pagpili sa mga tagapayo ay:

3.1 Pagbibigay ng Lupong Tagapagpaganap ng suhestiyon ukol sa mga propesor na maaaring maging tagapayo ng organisasyon.

3.2 Pagpapadala ng imbitasyon sa mga nasabing propesor; at

3.3 Pagboto at pagpili ng korum o sangkatlo ng mga aktibong residente.

ARTIKULO XII

MGA PINANSIYAL NA TUNGKULIN

Seksyon 1. Butaw (Membership Fee)

Ito ay ang kabayaran na kailangang bayaran ng mga bagong kasapi kasabay ng kanilang pagpasok sa organisasyon. Ito ay isang beses lamang babayaran.

Seksyon 2. Semestral Fee

Ito ay babayaran ng mga aktibong residenteng miyembro ng organisasyon bawat semestre.

Seksyon 3. Revolving Fee

Ito ay babayaran ng mga aktibong residenteng miyembro ng organisasyon sa tuwing may pagpupulong ang mga kasapi.

Seksyon 4. Liabilities

Ito ay ang mga pinansiyal na tungkulin ng mga residente na hindi nabayaran sa napag-usapang oras. Tuwing katapusan ng semestre ay magkakaroon ng multa ang mga hindi nakapagbayad o hindi nakapagsabi na sila ay hindi makakapagbayad.

ARTIKULO XIII

MGA PAGPUPULONG

- Seksyon 1.** Ang organisasyon ay inaasahan na magsagawa ng pagpupulong isang beses kada linggo.
- Seksyon 2.** Ang tagapangulo ay may pangunahing kakayahan na magpatawag ng mga espesyal at kinakailangang pagpupulong. Sa oras na wala ang tagapangulo, ang ikalawang tagapangulo ang siyang maaaring magpatawag ng mga nasabing pagpupulong.
- Seksyon 3.** Ang mga pagpupulong ng bawat lupon ay pamumunuan ng Pinuno ng Lupon.
- Seksyon 4.** Ang korum (2/3) ng kapulungan ay inaasahan na dumalo sa mga pagpupulong na gagawin para sa organisasyon.

ARTIKULO XIV

MGA KARAPATAN AT TUNGKULIN NG KASAPIAN

Seksyon 1. Ang mga kasapi ay magtatamasa ng mga sumusunod na mga karapatan at pribilehiyo:

1.1. Makadalo sa mga regular at espesyal na mga pagpupulong na ipatatawag ng organisasyon;

1.2. Maghalal at/o mahalal sa pamunuan at bumoto sa anumang pagpapasya sa mga usaping kinakaharap ng organisasyon;

1.3. Maging kagawad ng anumang komite at maging bahagi ng anumang pagkilos ng organisasyon;

1.4. Magbigay ng mga mungkahi at opinyon at mga konstruktibong puna at mungkahi sa pamunuan o sa sinumang kasapi ng organisasyon;

1.5. Kumatawan o magdala sa pangalan ng organisasyon at tumanggap ng mga katitikan ng mga pulong, publikasyon, at iba pang lathalain ng organisasyon at ng mga pag-aaral o pananaliksik nito;

1.6. Mabigyan ng kabatiran sa mga aktibidad ng organisasyon sa pamamagitan ng pagiging bahagi ng mga grupo sa *social media*, at magsiyasat ng 'libro de kwenta' at iba pang dokumento ng organisasyon, kabilang ang mga dokumento sa *shared drive*;

1.7. Humingi ng karapatang pagdinig at humiling sa mga hinaing (*redress of grievances*); at

1.8. Mapasailalim sa di-aktibong miyembro na klasipikasyon kung kinakailangan.

Seksyon 2. Ang mga kasapi ay inaasahang tumupad sa mga sumusunod na tungkulin at responsibilidad:

2.1. Dumalo ng mga regular at espesyal na mga pagpupulong

na ipinatatawag ng organisasyon;

2.2. Tumupad sa mga desisyon at patakaran ng organisasyon;

2.3. Mangalaga at magtaguyod ng simulain, pagkakaisa, at integridad ng organisasyon;

2.4. Magrekrut ng mga bagong kasapi para sa tuloy-tuloy na paglawak at pagiging buhay ng organisasyon;

2.5. Makibahagi sa pagpapaunlad sa kamalayan ng buong kasapian at sa kakayahan ng organisasyon na isabuhay ang paninindigan at mga layunin nito;

2.6. Gampanan ang lahat ng gawaing itinakda ng organisasyon at sa iba pang gawaing itinakda ng mga komiteng kani-kaniyang kinabibilangan; at

2.6. Makiisa sa mga mag-aaral at sa sambayanang Pilipino sa paghubog ng kamalayan tungo sa pagbabago ng lipunan.

ARTIKULO XV

MGA KARAMPATANG PARUSA

- Seksyon 1.** Ang mga miyembro ng organisasyon ay awtomatikong dadaan sa paglilitis kung sila ay:
- 1.1. Hindi tumutupad sa tungkulin na inilahad ng organisasyon;
 - 1.2. Naninira sa pangalan ng organisasyon;
 - 1.3. Gumagawa ng mga bagay na hindi makakabuti sa organisasyon; o
 - 1.4. Iba pang mga paglabag sa organisasyon.
- Seksyon 2.** Ang miyembro ng organisasyon na pinatawan ng suspension ay hindi maaaring sumali sa kaganapan at aktibidad ng organisasyon, alinsunod sa napag-usapang oras.
- Seksyon 3.** Ang miyembro ng organisasyon na ititiwalag ay hindi na ituturing pang miyembro ng organisasyon.
- Seksyon 4.** Ang miyembro ng lupong tagapagpaganap na papatawan ng impeachment ay tatanggalin na sa kanyang pwesto sa lupong tagapagpaganap at hindi na rin magkakaroon pa ng karapatan na tumakbo sa mga susunod na termino.
- Seksyon 5.** Ang lahat ng mga alituntunin at mga karampatang parusa ay pangungunahan ng binuong fact-finding committee at pagdedesisyunan ng buong kasapian o korum na dalawang katlo.

ARTIKULO XVI

PAGTITIWALAG NG MGA KASAPI AT PAMUNUAN

Seksyon 1. Pagtitiwalag sa mga Kasapi at Pamunuan

1.1. Ang paglabag sa mga paninindigan at layunin ng UP SANDIWA SAMAHANG BULAKENYO ay sapat na dahilan upang itiwalag ang sinumang kasapi ng samahan.

1.2. Ang sadyang hindi pagtupad sa mga tungkulin ng isang kasapi ng UP SANDIWA SAMAHANG BULAKENYO ay sapat na dahilan upang itiwalag ang sinumang kasapi.

1.3. Ang pagganap sa mga gawi na lubhang nakakasira ng integridad, pagkakaisa, at simulain ng samahan ay sapat na dahilan upang itiwalag ang sinumang kasapi ng samahan.

1.4. Ang lupon sa kasapian ang siyang bubuo ng isang grupo na mamamahala sa paghahain ng rekomendasyon, pagtitiwalag ng isang kasapi, pati ng paglilitis sa kinauukulang kasapi na siyang pagbabatayan ng pasya ng buong kasapian o ng korum (2/3) ng buong kasapian. Ito ay tatawaging fact-finding committee.

Seksyon 2. Pagtitiwalag ng Pamunuan

2.1. Ang sinumang kasapi ng pamunuan ay maaaring matiwalag sa tungkulin batay sa alinman sa mga sumusunod:

2.1.1. Pagmamalabis sa katungkulan;

2.1.2. Pagpapairal ng sariling interes sa ibabaw ng interes ng samahan;

2.1.3. Paglabag sa paninindigan at layunin ng samahan;

2.1.4. Sadyang hindi pagtupad sa tungkulin; at

2.2. Ang sinumang kasapi ng UP SANDIWA SAMAHANG BULAKENYO ay maaaring magmungkahi sa Lupon Tagapagpaganap ng pagtatanggal sa katungkulan ng sinumang

kasapi ng pamunuan na pagdedesisyunan ng 2/3 ng kasapian,

2.3. Ang pangkalahatang kasapian lamang ang siyang tanging may kapangyarihang magtiwalag sa sinumang opisyal at pagtitibayin ito ng korum o ng dalawang-katlo (2/3) ng buong kasapian.

Seksyon 3. Proseso ng Pagtitiwalag

3.1. Ang sinumang kasapi na lalabag sa mga paninindigan ng samahan ay marapat na sumailalim sa proseso ng pagtitiwalag.

3.2. Bibigyan ng karampatang babala ang sinumang maging kandidato sa pagtitiwalag. Magkakaroon ng isang linggong paghihintay sa kanyang tugon.

3.3. Ang hindi pagtugon sa babala ay nangangahulugan ng pagsasagawa ng awtomatikong deliberasyon ng simpleng mayorya o ng korum.

Seksyon 4. Proseso ng boluntaryong pagtiwalag

4.1. Ang mga residenteng nagnanais tumiwalag ay kinakailangang:

4.1.1. Bayaran ang kanilang natitirang mga pinansiyal na tungkulin;

4.1.2. Lumikha at magpadala ng pormal na sulat na naglalaman ng mga rason at dahilan kung bakit boluntaryong titiwalag;

4.1.3. Humarap sa kasalukuyang kasapian o kapulungan at ipresenta ang ginawang sulat;

4.1.4. Pagsasang-ayunan ng dalawang katlo ($\frac{2}{3}$) ng kasapian o kapulungan.

ARTIKULO XVII

HALALAN

- Seksyon 1.** Ang Pamunuan ng UP SANDIWA SAMAHANG BULAKENYO ay pipiliin sa pamamagitan ng demokratikong eleksyon ng buong kasapian o korum na dalawang-katlo (2/3) nito. Magsasagawa ng isang pagpupulong para rito at ang paghahalal sa pamunuan ay maaaring pagtibayin ng simpleng mayorya ng buong kasapian o ng korum nito.
- Seksyon 2.** Ang Pamunuan ng UP SANDIWA SAMAHANG BULAKENYO ay manunungkulan sa loob ng isang taong pang-akademiko. Isasagawa ang eleksyon isang linggo pagkatapos ng ikalawang semestre, at ang bagong Pamunuan ay agad na magsisimulang manungkulan.
- Seksyon 3.** Ang naunang hanay ng pamunuan ay bubuo ng electoral board upang pangasiwaan ang buong proseso ng halalan hanggang sa makapili na ng panibagong hanay ng lupong tagapagpaganap.
- Seksyon 4.** Ang electoral board ay:
- 4.1.** Bubuhin ng hindi bababa sa anim na miyembrong magtatapos o mga residenteng nasa kanilang huling semestre na sa unibersidad; at
 - 4.2.** Mawawalan ng kapangyarihan na maghalal at bumoto.
- Seksyon 5.** Ang electoral board ay inaasahan na:
- 5.1.** pangasiwaan ang buong proseso ng halalan;
 - 5.2.** gumawa ng guidelines patungkol sa nominasyon, paggawa ng General Plan of Action (GPOA), pagtanggì, at botohan; at
 - 5.3.** isantabi ang personal na interes at isasaalang-alang ang

kapakanan ng organisasyon sa bawat desisyong gagawin.

ARTIKULO XVIII

PAGPAPAIRAL

Ang Saligang Batas na ito ay iiral sa pamamagitan ng buong pagkakaisang boto ng mayoryang kasapian.

ARTIKULO XIX

MGA SUSOG

- Seksyon 1.** Ang mosyon ng pagsususog ay maaari lamang gawin ng sinumang kasapi sa pangkalahatang pagpupulong ng kasapian o korum ng SANDIWA.
- Seksyon 2.** Anumang susog ay magkakaroon lamang ng bisa sa pamamagitan ng pagsang-ayon ng dalawang-katlo (2/3) o korum ng kasalukuyang kasapian.
- Seksyon 3.** Anumang susog o mga pagbabagong gagawin sa konstitusyon ay agad na maipapairal pagkatapos ang pagsang-ayon ng dalawang-katlo (2/3) o korum ng kasalukuyang kasapian.